

又玄集

又

玄

集

又

玄

集

又玄集

左補闕韋莊述

謝玄暉文集盈編止誦澄江之句。曹子建詩名冠古。唯吟清夜之篇。是知美稼千箱。兩岐爰少。繁絃九變。大護殊稀。入華林而珠樹非多。閱衆籟而紫簫惟一。所以擷芳林下。拾翠岩邊。沙之汰之。始辨辟寒之寶。載彫載琢。方成珊瑚之珍。故知領下採珠。難求十斛。管中窺豹。但取一斑。自國朝大手名人。以至今之作者。或百篇之內。時記一章。或全集之中。唯徵數首。但掇其清詞麗句。錄在西齋。莫窮其巨派洪濶。任歸東海。檢其記得者。才子

一百五十人誦得者名詩三百首長樂暇日陋巷窮時聊撼際以書紳匪攢心而就簡此蓋詩中鼓吹名下笙簧擊鳧氏之鐘霜清日觀淬雷公之劍影動星津雲間分合璧之光海上運摩天之翅奪造化而雲雷噴涌役鬼神而風雨奔馳但思其食馬留肝徒云淖指豈慮其烹魚去乙或致傷鱗自慙乎鼉腹易盈非嗜其熊蹯獨美然則律者旣採繁者是除何知黑白之鵝強識淄澠之水左太冲十年三賦未必無瑕劉穆之一日百函焉能盡麗是知班張屈宋亦有蕪辭沈謝應劉猶多累句

雖遺妍可惜。而備載斯難。亦由執斧伐山。止求嘉木。挈瓶赴海。但汲甘泉。等同於風月烟花。各是其植。梨橘柚。昔姚合撰極玄集一卷。傳於當代。已盡精微。今更採其玄者。勒成又玄集三卷。記方流而目眩。閱麗水而神疲。魚兒雖存。筌蹄是弃。所以金盤飲露。唯採沆瀣之精。花界食珍。但饗醍醐之味。非獨資於短見。亦可貽於後昆。採實去華。俟諸來者。時光化三年七月日。

杜甫

李白

王維

常建

王昌齡

韓琮

司空曙

李賀

張九齡

高適

盧綸

錢起

李華

岑參

李嘉祐

崔顥

李益

任華

宋之問

戴叔倫

皇甫冉

崔峒

劉長卿

郎士元

杜誦

朱灣

陳羽

皇甫曾

鄭常

孟雲卿

楊凌

李宣遠

劉皂

章孝標

孟浩然

楊虞卿

祖詠

李端

韓翃

陶翰

章八元

姚倫

李頎

張衆甫

崔國輔

綦母潛

孟郊

崔曙

冷朝陽

于良史

丘爲

蘓廣文

西郊

杜甫

時出碧雞坊。西郊向草堂。
市橋官柳細。江路堦梅香。
傍架齊書帙。看題檢藥囊。
無人覺來往。踈懶意何長。

春望

同

國破山河在。城春草木深。
感時花濺淚。恨別鳥驚心。
烽火連三月。家書抵萬金。
白頭搔更短。渾欲不勝簪。

禹廟

禹廟空山裏。秋風落日斜。
荒庭垂橘柚。古屋畫龍蛇。
雲氣虛青壁。江聲走白沙。
早知乘四載。踈鑿控三巴。

山寺

同

野寺殘僧少。山園細路高。麝香眠石竹。鸚鵡啄金桃。亂
水通人過。懸崖置屋牢。上方重閣晚。百里見纖毫。

遣興

同

干戈猶未定。弟妹各何之。拭淚霑襟血。梳頭滿面絲。地
卑荒野大。天遠暮江遲。衰老那能久。應無見汝期。

送韓十四東歸觀省

同

兵戈不見老萊衣。歎息人間萬事非。我已無家尋弟妹。
君今何處訪庭闈。黃牛峽靜灘聲轉。白馬江寒樹影稀。

此別還須各努力。故鄉猶恐未成歸。

南隣

同

錦里先生烏角巾。園收芋栗不全貧。慣看賓客兒童喜。
得食階除鳥雀馴。秋水纔深四五尺。埜航恰受兩三人。
白沙翠竹江村暮。相送柴門月色新。

蜀道難

雜言

李白

噫嘻噉危乎高哉。蜀道之難難於上青天。蠶叢及魚鳧。
開國何茫然。兩來四萬八千歲。乃不與秦塞通人煙。西
當太白有鳥道。可以橫絕峨眉巔。地崩山摧壯士死。然

後天梯石棧相勾連。上有橫河斷海之浮雲。下有衝波
逆折之廻川。黃鶴之飛兮上不得。猿猱欲渡愁攀牽。青
泥何盤盤。百步九折縈岩巒。捫參歷井仰脇息。以手拊
膺坐長歎。問君西遊何當還。長途巉岨不可攀。但見悲
鳥號古木。雄飛從雌繞林間。又聞子規啼夜月。愁空山。
蜀道之難難於上青天。使人聽此凋朱顏。連峯入雲幾
千尺。枯松倒挂倚石壁。崩湍瀑流爭喧豗。砢崖轉石萬
壑雷。其嶮若此。嗟爾遠道之人胡爲乎來哉。劍閣崢嶸
而崔嵬。一夫當關。萬大莫開。所守或非人。化爲狼與豺。

朝避猛獸。夕避長蛇。磨牙吮血。殺人如麻。錦城雖云樂。
不如早還家。蜀道之難。難於上青天。側身西望長咨嗟。

古意

同

白酒初熟山中歸。黃雞啄黍秋正肥。呼童烹雞酌白酒。
男女歡笑牽人衣。高歌取醉欲自慰。起舞落日爭光輝。
遊說萬乘苦不早。著鞭跨馬涉遠道。會稽愚婦輕買臣。
余亦辭家西入秦。仰天大笑出門去。我輩豈是蓬蒿人。

長相思

同

美人在時花滿堂。美人去後空餘床。床中繡被竟不掩。

又玄集 卷一
至今三載猶聞香。香亦竟不滅。人亦竟不來。相思黃葉落。白露點青苔。

金陵西樓月下吟

同

金陵夜寂涼風發。獨上西樓望吳越。白雲映水搖空城。白露垂珠濕秋月。月下長吟久不歸。古來相接眼中稀。解道澄江靜如練。令人長憶謝玄暉。

觀獵

王維

風勁角弓鳴。將軍獵渭城。草枯鷹眼疾。雪盡馬蹄輕。忽過新豐市。還歸細柳營。迴看射鵰處。千里暮雲平。

終南山

同

太一近天都。連山到海隅。白雲回望合。青靄入看無。分
埜中峰變。陰晴衆壑殊。欲投人處宿。隔水問樵夫。

勅借岐王九成宮避暑

同

帝子遠辭丹鳳闕。天書遙借翠微宮。隔牕雲霧生衣上。
卷幔山泉入鏡中。林下水聲喧語笑。巖間樹色隱房櫳。
僊家未必能勝此。何事吹簫向碧空。

送秘書晁監歸日本

同

積水不可極。安知滄海東。九州何處遠。萬里若乘空。向

國唯看日歸帆。但信風鰲身映天黑。魚眼射波紅。鄉樹扶桑外。主人孤島中。別離方異域。音信若爲通。

吊王將軍

常建

嫖姚北伐時。深入強千里。戰餘落日黃。軍敗鼓聲死。常聞漢飛將。可奪單于壘。今與山鬼隣。殘兵哭遼水。

題破山寺後院

同

清晨入古寺。初日照高林。竹逕通幽處。禪房花木深。山光悅鳥性。潭影空人心。萬籟此都寂。但餘鐘磬音。

長信宮秋詞

王昌齡

奉帚平明金殿開。暫將團扇共徘徊。玉顏不及寒鴉色。
猶帶昭陽日影來。

春愁

韓琬

金烏長飛玉兔走。青鬢長青古無有。秦娥十六語如絃。
未解貪花惜楊柳。吳魚嶺雁無消息。水誓蘭情別來久。
勸君年少莫遊春。暖風遲日濃如酒。

公子行

同

紫袖長衫色。銀蟬半臂花。帶裝盤水玉。鞍繡坐雲霞。別
殿承恩澤。飛龍賜渥洼。控羅青梟轡。鏤象碧重葩。意氣

催歌舞。闌珊走鈿車。袖彰雲縹緲。釵轉鳳歌斜。珠卷迎
歸箔。紅筵晃醉紗。唯無難夜日。不得似仙家。

駱谷晚望

同

秦川如畫渭如絲。去國還鄉一望時。公子王孫莫來好。
嶺花多是斷腸枝。

暮春送客

同

綠暗紅稀出鳳城。暮雲樓閣古今情。行人莫聽官前水。
流盡年老是此聲。

謾李端見贈

司空曙